

# Masyarakat Cina diminta nilai kata2 Encik Lim

**KUALA LUMPUR, Jumaat** — MCA hari ini mengingatkan masyarakat Cina supaya menilai setiap perkataan yang dikeluarkan oleh Setiausaha Agung DAP, Encik Lim Kit Siang, kerana kesannya akan dirasai oleh generasi akan datang.

Pemangku Presiden MCA, Datuk Dr Neo Yee Pan, menegaskan apa yang dilakukan oleh Encik Lim hanyalah untuk menyemarakkan kemarahan masyarakat Cina, sehingga merugikan mereka sendiri.

"Setiap kali dia membuka mulut, anak-anak kita yang akan menanggung kesannya nanti," katanya.

Datuk Dr Neo menisfatkan kata-kata yang diluahkan oleh Encik Lim sebagai membahayakan kaum Cina sendiri. Menurut pemimpin MCA

itu, contohnya terbukti bila meletusnya kejadian 13 Mei 1969.

"Apa yang dilakukan oleh DAP adalah untuk kepentingan politiknya. Ini jauh berbeza dengan MCA yang mempunyai rancangan jangka panjang yang membina.

"Oleh itu, masyarakat Cina seharusnya menilai apa yang diucapkan oleh pemimpin pembangkang itu dan jangan mengikutinya secara membuta tuli," ujarnya.

## Tenggelam

Datuk Dr Neo menisfatkan DAP yang ada sekarang sebagai kekal di tahap yang sama ketika ia ditubuhkan 18 tahun lalu.

"Parti itu tidak boleh dijadikan pilihan bagi rakyat negara ini untuk menubuhkan kerajaan dan tidak nampak pemimpin-pemimpin baru yang layak.

"Dari dulu hingga se-

karang, parti itu dipimpin oleh orang yang sama, sedangkan para pemimpin parti lain telah bertukar beberapa kali.

"Dalam sesebuah parti politik, kepemimpinan saling bertukar ganti untuk membolehkan pemimpin baru mengambil alih," katanya.

Pemimpin MCA itu juga menisfatkan Encik Lim sebagai pemimpin yang suka membolot kuasa sehinggakan suara pemimpin lain tenggelam.

"Bagi DAP, setiap perkara yang dilakukan oleh MCA semuanya salah. Dulu mereka mahukan bekas Presiden MCA bersara. Tapi selepas beliau bersara, perkara lain pula yang ditimbulkan.

"Dalam pilihanraya kecil Parlimen Seremban, DAP telah kehilangan modal dan terpaksa membangkitkan isu lama," tambah beliau.